

# 1 KORINTOFÓ

## Paulo Ovoli Ɖtonyade Kĩ Etsɛɛ Ɛma Korintofó

I Yĩ Paulo kĩ Baguma ve ne ye kawɛ onukpɛ, kĩ nkɛna Kristo Yesu fɔto ɔnyanɛ, mo boe ɔwaɛ Sostene sekɛ ovoli kĩ to.

II Bɔtsɛɛ ovoli kĩ bɔakpa batɛ badonɛ a kĩ bideĩ nɛ Korinto, mo bati a kĩ Baguma ve kĩ bɛkɛna ye bati kpalɛwa, kĩ benye ye bade nɛ ɔmoa kakɛna mo Kristo Yesu a. Bɛve mi bati kĩ mo bati a flee kĩ basum boe Ɖlate Yesu Kristo nɛ kako nye kako. Yesu kĩ nye be mo boe flee Ɖlate.

III Mawã Baguma boe Ɖlɛga mo boe Ɖlate Yesu Kristo kĩ bɛmo mi kɔnya, bɛkpa mi lukudo lemɛ.

*Nhila Kĩ Bɔana Katomɛna Yesu Kristo Kame.*

IV Luwi daa manyɛ yĩ Baguma kole nɛ mi lolɔ kĩ etsã Yesu Kristo akũ ɛmo mi kɔnya.

V Nɛ mi ɔmoa kakɛna mo Kristo sũ ni, mina akũ nɛ fɔtsa flee kame, titiliwu nɛ mi kɔdzɛla kalɛ mo kadikanyi kame.

VI Baguma fɔletsɛ a nɛ Kristo akũ a sipi nɛ mi kame paa,

VII kĩ foesũ mite hũhũ kame futetsa fudi nye fudi kĩ fusĩ mi, nɛ kĩ midzi miadzɔɛ boe Ɖlate Yesu Kristo kaya a.

VIII Yaapi mi edomo akũ mo ɔsĩ mo ɔsĩ kɛnaawo kawũna, ayekĩ nfumsu adima lelãana nɛ mi akũ nɛ boe Ɖlate Yesu Kristo Luwi a akũ.

**IX** Baguma a kī ενε mi kī mikena ɔmɔa mɔ ye Obi, boe ɔlate Yesu Kristo a, nye oti kī yadi ɔnɔkɔali.

*Kasē Kī Kena Ne Asoli a Kame.*

**X** Nwaē ame, ndzē ne boe ɔlate Yesu Kristo otumi akū make mi a flee aduli kī mikena ɔmɔa ne letsa a kī miale a akū ayekī kasē leláaya ne mi kayite. Mina onukpē mɔa ne mi kakona mɔ fukī foe akū mike otse a kame,

**XI** kitonekī, nwaē ame, bati badi to Kloe toto kame beyabi yī pefee kī ɔdze deī ne mi kame.

**XII** Mifō nle foe limii, bati a le kī mi kame badi ale kī, “Yī kō Paulo ntomena.” ɔbebā leme ale kī, “Ntomena Apolo.” Odi leme bo, “Ntomɔ Petro.” Ade odi leme bo, “Ntomɔ Kristo.”

**XIII** Mavia mi ni, besē Kristo ne kutsukutsu kame mbɔee? Paulo bebɔa ne asendua akū ne mi lolɔ mbɔee? Mbɔee kī bekena mi kame odi mui kawola amanie nde Paulo fɔtsa bakolene aye?

**XIV** Manye Baguma kole kī ntákena mi kame odima mui kawola amanie keba Krispo mɔ Gayo odi pe.

**XV** Foesū odima lelápuli ele kī bekena ye mui kawola amanie ne yī dī akū.

**XVI** Nuwī mate ane kī nkena Stefana mɔ ye toto kame bati mui kawola amanie, leme maáte ane kī nwola oti bebā odima.

**XVII** Kristo tádo yī kī ìyaakena mui kawola amanie nkpa bati. Edo yī kī ìyaade letsā ne Kale Wī a akū, kī ntákɔa batidziwa kadikanyi nle ke ayekī Kristo wuda ne asendua akū kobē a leláakena fɔtsa pupulidza.

*Kristo Fɔlets a Nye Baguma Kobē Mɔ Nyansā.*

**XVIII** Kristo wuda ne asendua akū foletsa a nye fudzimbisa fōkpa bati a kī betsẽ ne kawo osi akū, leme boe a kī belamo kate a, bomó foletsa kī buyi osū nde Baguma kobē aye.

**XIX** Ne Katsēle Kpalewa kame a, Baguma le kī, “Maawola kadi banyine a kadikanyi, ade maanye tuvoli banyine kayokanu a iyi ne owē a.”

**XX** Foesū finyaa ndia kadi banyine a dzē? Ndia tuvoli banyine fotsa batsane a mo foletsa bavelene a deī? Baguma kōa foe etsa kī katinya kī kame kadikanyi nye fudzimbisa.

**XXI** Kitonekī Baguma ne ye kadikanyi onukpē ni, ekena foe kī batidziwa betatsā be kadikanyi kame binyi ye. Mbom letsa kī bave boe tidzimbilatsā kade foletsa kī a, Baguma kōa foe enye bikī bete ye bido a.

**XXII** Yudafō awe awāwā fotsa bemó, ade Grikifō leme tomena katinya kadikanyi liti a.

**XXIII** Leme boe kō boade letsā ne Kristo wuda ne asendua akū. Foletsa kī aba Yudafō tuwūna, ade fonye fōkōasiatsa fōkpa bikī benyé Yudafō a.

**XXIV** Leme be a kī Baguma ve a kī benye Yudafō, mo bikī benye Helafō a ni, foletsa a nye Kristo kī enye Baguma kobē mo ye kadikanyi.

**XXV** Kitonekī letsa a kī boamo nde Baguma tidzimbil nihinie a bē otidziwa kadikanyi kolaa, ade ke awā kī fōkena nde Baguma kobē do ne ye lekenana kame a, bē otidziwa kobē kolaa.

**XXVI** Nwaē ame, mikōna mi akū midā ayekī mina fomō Baguma ve mi a. Ne batidziwa kamō onukpē ni, mi badi sukuloo nye kadi banyine, iye bikī bideī kobē, iye kī mi akū deī obu.

XXVII Baguma bua epau katinya kame fotsa kī foe akū lélá nfaso, kī yakoa foe edo kadi banyine konyoã, ade epau fotsa a kī fólá akū osí kī yakoa foe edo bikī bideĩ kobê a konyoã.

XXVIII Baguma pau fotsa a kī bati lábu foe kado ne letsama kame, kasupa foe leme a, kī yakoa foe ewola fukī bati akona kī fote koya a.

XXIX Baguma kena fukī ayekī otidziwa odima lelápuli epia ye akū ne ye ane.

XXX Leme Baguma kī lefō mikena omoa mo Yesu Kristo, ade efō Kristo nye boe kadikanyi a. Baguma tsā ye akū ekena boe bati kpī, ekpale boe akū, efō bona nkpā.

XXXI Foesū Katsela Kpalewa a le kī, “Oti kī yawe kī yapia ye akū ni, epia ne letsa a kī boe Ọlate kena a akū.”

## II

*Paulo Tsa Fotsa Ne Kristo a Kī Bepoa Ne Asendua Akū a Akū.*

I Nwaẽ ame, ade foesū loko a kī ñya ne mi sekẽ kī matsa Baguma onokoali kale kolawa a, ntákwa onukpẽ menemene foletsa kale baũbaũ mo nyansā dzununuunu ntsa mi foe.

II Kitonekī kī nna ne mi kame a, nke otse kī manye ane ne letsa nye letsa akū mbõente Yesu Kristo mo ye wuda ne asendua akū a.

III Foesū kī ñya ne awā a, ndā kpetee, nna ne libe mo kukũtila kame,

IV ade yĩ fotsa katsa mo yĩ ọledo a tánya batidziwa kodzela kale baũ baũ ñye nyansā tisi akū foletsa, mbom nde letsā a kayo kanu a kī Baguma Hũhũ kobê a nye etsa a.

V Ne foesũ mi katẽkado ledzẽ ne batidziwa nyansã akũ, mbom kedzẽ ne Baguma kóbẽ akũ.

*Baguma Hũhũ a Nyina Letsa Nye Letsa.*

VI Leme made kadikanyi letsã kakpa bikĩ bibo ane ne hũhũ kame a. Leme fonyé katinya kĩĩ kame kadikanyi iye ke kóbẽ kĩ kanya katinya akũ. Kóbẽ a akũ olome lamena katinya.

VII Kadikanyi foletsa a kĩ matsa a nye Baguma kadikanyi kolawa, kĩ bekõa bekõla batidziwa, leme Baguma nye foe eyi ekpa boe kadela ne ode fomõ ebõa katinya malo.

VIII Katinya kame kĩĩ banokõẽ a kame odima tányi kadikanyi kĩĩ. Nte kanyi binyi ke kufe betábõa boe Olate kpalewa a ne asendua akũ.

IX Leme Katsela Kpalewa a le kĩ,  
 “Letsa a kĩ linebi támõ tõ,  
 soto tánu tõ,  
 letsa a kĩ odima tákõna tõ kĩ laapuli leya a,  
 ade foe pẽpẽpẽ Baguma mane eyi ekpa bati  
 a kĩ bawẽ ye a.”

X Leme ade boe Baguma tsã ye Hũhũ Kpalewa akũ enye foe etsa a.

Hũhũ a awe letsa nye letsa kame yededeede, ade yafiifi Baguma fõtsa a kĩ ekõla a dzu-nunuunu kame malo a.

XI Odima leláapuli enyi letsa a kĩ oti bebã akõna mbõente oti a mõawe hũhũ a kĩ edeĩ ne ye kame a. Ade ayea odima leláapuli enyi Baguma kakõna mbõente ye mõawe Hũhũ odi.

XII Botáte katinya kĩĩ kame hũhũ, mbom botẽ Baguma Hũhũ a kĩ edo a, ayekĩ bóanyi fõtsa a kĩ Baguma kpa boe a flee.

XIII Foesũ nné batidziwa kadikanyi kĩ batsa bɔnɛ bɔalɛ kalɛ, mbom bɔnɛ fɔletsa a kĩ Hũhũ a tsa boe a bɔkɔa bɔanye hũhũ kame ɔnɔkɔali fɔtsa a katsa bikĩ Hũhũ deĩ nɛ be kame a.

XIV Odi nye odi kĩ Hũhũ a lɛlɛa ye kame ni, ɛlɛapuli ɛtɛ futetsa a kĩ futo Baguma Hũhũ a sɛkɛ. Oti a na odu tɛnu foe kayɔ koũ, fudzimbitsu fɔanɛ fɔkpa ye. Fɔnye fudzimbitsu fɔkpa ye, kitonɛkĩ mbɔɛntɛ bikĩ Hũhũ deĩ nɛ be kame a aapuli binu Hũhũ kame fɔletsa kayɔ.

XV Odi nye odi kĩ Hũhũ a deĩ nɛ ye kame aapuli enu fukĩ flee kayɔ. Lɛmɛ odima lɛlɛapuli ɛdzɛmɔ ye.

XVI Katsɛlɛ Kpalewa a lɛ kĩ,  
 “Owei nyina lɛtsa a kĩ de boe ɔlate akɔna?  
 Owei aapuli ɛkpa ye kɔdɛ?”  
 Lɛmɛ boe kɔ Kristo kakɔna a deĩ nɛ boe kame.

### III

#### *Baguma Adzuma Bakenanɛ Bɔanɛ.*

I Nwaɛ amɛ, fɔnye ɔnɔkɔali kĩ ntɛpuli mbi mi fɔletsa ndɛ ayekĩ maabi bikĩ Hũhũ Kpalewa deĩ nɛ be kame aye, mbom mbi mi fɔletsa ndɛ bati kĩ bidzi nɛ sukɛna kame kĩ bɛnye babisɛ nɛ Kristo katekado kame.

II Tɛmɛ mui nkpa mi, nné funitsã kɔkɔlɔkɔ kitonɛkĩ mitábo anɛ tɔ kĩ mianya foe. Finyaakĩ malo mitáwo tɔ kĩ mianya foe,

III kitonɛkĩ mibuki midzi ndɛ ayekĩ katinya kame kĩ bati dzi nkpa. Ntɛ miano lineke, kapaa mɔ akũ ni, nné katsa fɔatsa kĩ minye katinya kame bati kĩ bidzi nɛ ke tisi akũ?

IV Nte mi kame ọmọa le kī, “Ntomọ Paulo,” mọ ọbebā bo, “Ntomọ Apolo,” nné katsa fọatsa kī miakena fọtsa nde katinya kame bati aye?

V Ne foe kame a, owei nye Apolo? Owei lemẹ nye Paulo? Baguma adzuma bakenane keke boane, ade mitsā boe akū mite mido a. Boe kame odi nye odi akena adzuma a kī Baguma kpa ye a.

VI Yī lidu kutse libi a, ade Apolo ko de mui a, lemẹ Baguma lefō kutse a bo ane.

VII Oti a kī edu mọ ekī eko de mui a tásī. Baguma lisī, kitonekī ade ye lefō kutse a bo ane a.

VIII Kavemena kadima leláa ekī edu mọ ekī eko mui a kayite. Baguma aase be kame odi nye odi koto ne ye adzuma a kī ekena onukpē.

IX Boe, buboomu boakena adzuma bokpa Baguma, ade mi nye Baguma koba a kī koe kame boakena adzuma a. Minye Baguma kola a kī boake a.

X Ne kī Baguma mọ yī konya sū ni, nkena adzuma nde kola okene wī. Ìyi litekū loyode a kayo ade oti bebā lamena kake kadela ne ode a. Lemẹ kenẹ kī ekī elamena kake kadela edā kadā wī ne ayekī yake a akū.

XI Kitonekī Baguma kọa Yesu Kristo eyi kọkọe nde litekū loyode kī odima leláapuli eyi lebebā kayo.

XII Badi aakọa sika ngbā ìye sika owoe ìye boe kī bete kọya bike bite ne litekū a akū, babebā aakọa titse ìye tuwī, ìye lipili bike bite.

XIII Lemẹ baanye kola a kī odi nye odi lamena kake a kutitse betsa ne Kristo Luwi a akū. Kitonekī ne Luwi a na akū fi aanye odi nye odi

adzuma kī ekena a kanya. Baakwa fi kīi beso tudzuma a bedā, fotsa te koyakate leme.

**XIV** Nte fotsa a kī bike bite ne litekū leyode a akū puli fodza ne fi onukpē ni, kola okene a aana kotokase.

**XV** Leme nte odi fotsa vio ni, elāana kotokase, leme ye moawe a yaana kate nde kalo elo ene ne fi a kame aye.

*Minye Baguma Asoli Kola Kpalewa a.*

**XVI** Minyina kī Baguma Asoli Kola miane, kī Baguma Hūhū a dzi ne mi kame?

**XVII** Foesū nte odi bula Baguma Asoli Kola a kade ni, Baguma leme aawola ye, kitonekī Baguma Asoli Kola akū kpale. Ade mi nye ye Asoli Kola a.

**XVIII** Odima etake ye akū. Nte mi kame odi kona kī enyina kadi ne katinya kīi kame kamō onukpē ni, kefeta kī edani ekena odzimbifo mbom ayekī yaakena onyansāni ne Baguma ane.

**XIX** Kitonekī letsa a kī bati abu nde kadikanyi a ni, fonye fudzimbisa ne Baguma ane. Nde ayekī Baguma Katsela Kpalewa le a, “Baguma api anyansāfo ne be moawe kadikanyi kame.”

**XX** Ade bibuki betsele ne Katsela Kpalewa kame kī, “Boe Olate nyina kī, bikī binyina kadi a be adzuni nye fotsa pupulidza.”

**XXI** Foesū ketāne kī odima apia ne letsa a kī bati apuli kakena a akū, kitonekī letsa nye letsa nye mi fude.

**XXII** Paulo, Apolo, Petro, katinya kīi, nkpā iye wuda, loko kīi iye, likī laaya o-o, foe flee fonye mi fude.



XXⅢ Leme mi kō minye Kristo bade, ade Kristo leme nye Baguma ode a.

## Ⅳ

### *Bonye Kristo Fọto Banyane.*

<sup>I</sup> Mibu boe nde Kristo basumune a kī be awe Baguma kōa ọnọkọali fọtsa kọlawa a edo.

<sup>II</sup> Letsa kī bawe bitomena adzuma ọkena kīi odu awe nye kī, yadi ọnọkọali ekpa ọlate.

<sup>III</sup> Finyaakīi ntséla kọlaa nte miadzemo yī, iye odi bebā adzemo yī. Ade maádzemo yī akū malo a.

<sup>IV</sup> Yī ọwọle kame kpale, leme fọátsa kī tokpa leláa yī akū, kitonekī boe Ọlate nye oti kī yaadzemo yī.

<sup>V</sup> Foesū odima etadzemo odi kenaawo kī loko wī a wo ọto. Kene kī kadze nkae a kedzole boe Ọlate a kaya. Ade ye aanye ọtū kame fọtsa belawa mo bati kakona a kī beko a beko a kanya a. Ade loko a na Baguma aakoa kamu ekpa odi nye odi kī efeta ekpa kamu a.

<sup>VI</sup> Nwaē ame, ne mi kale sū, nkoa bomo Apolo fọletsa kīi nkpa nfantuhū ne letsa a kī matsa a akū, ayekī míanu fọletsa a kī bale a kayo kī, “Mitsā ne osi kpīi a akū.” Mi kame odima etapia ne oti moa akū loko esupa ọbebā.

<sup>VII</sup> Owei lekena mi bati kī bete koya beba babebā? Nné Baguma lekpa mi letsa nye letsa kī midei a? Loko nde sū miadela akū nde nné Baguma lite mi fọtsa a na?

<sup>VIII</sup> Mi awe ta letsa nye letsa a kī lisī mi a kọkọe mbọe? Midani asikafọ kọkọe mbọe? Midani fọgā tito kī boe bonyé fọgā malo? Awoo. Mawe kī

minye fōgā lokoa boe malo bonya fōgā bubumo mi kufe.

**IX** Foadā yī nde Baguma kōa boe fōto banyane a edzela ne kadzakō nkae. Bōkena nde bati kī biku kōto kī kene kī beko be ne kanade ane, ade bōkena nde fōtsa dāwa leme bōkpa katinya kame bati mō ode fōto banyane flee a.

**X** Ne Kristo sū bonye badzimbifo, leme mi minye kadi banyine ne omōa kakena mō Kristo kame! Bolá kōbē leme mi kō mideī kōbē! Bati lābu boe kado ne letsama kame, leme mi kō bakpa mi obu!

**XI** Kito keyawo nviā loko kīi malo budzi kōle mō omōado, budeī ne tetadie kpeliwa kame, babo boe, ade bōtsē bōato katē kī bolá kadzikō.

**XII** Bōakena adzuma mō osī mō osī kaveli akū. Nte bati dumu boe bōakpa be nhila, ade nte bitomō boe liti bōado owōle kate foe.

**XIII** Nte bivūna boe a, bōakōa owōle bōee kakpa be mbuaye. Bekena boe nde katinya kame fukluku kī bonye tite akū fukluku kawulakō keyawo nviā kīi.

**XIV** Maátsele mi fukīi kī mado mi kōnyōā, mbom makōa foe nde mi nde yī babi kī mawe be kale aye.

**XV** Kitonekī nte mideī bati mpim ewua kī batsa mi fōtsa ne Kristo akū malo ni, olega mōape mideī. Ntsā Kale Wī a kale kame ndani mi olega, kitonekī mikena omōa mō Yesu ne mi nkpā kame.

**XVI** Foesū make mi aduli kī mikole yī obla.

**XVII** Ne fukīi sū mado Timoteo kī eya ne mi sekē. Enye yī mōawe obi ne Kristo kame, kī maátuno ye kale ade enye oti kī yadi onōkōali ne ye kadzi

kame a. Yaate mi ane ne tisi ɔɔẽ a kĩ te akũ ndzi nkpã ne Kristo kame a akũ. Ade foe leme matsa ne ɔsoli a flee kame ne kako nye kako a.

**XVIII** Mi kame badi miata akũ, kitonekĩ mikona kĩ nláabuki ñyaasela mi.

**XIX** Leme nte boe ɔlate tunɔ kɔ ni, owi leláabuna kɔlaa mɔ maaya ne mi sekẽ. Nte ñya ni, maawe kĩ manyi kɔbẽ a kĩ bikĩ bata akũ deĩ, nné letsa a kĩ betse bale a odi.

**XX** Kitonekĩ Baguma legākanya a lenyé onukpẽ kame fɔletsa kale keke, mbom fɔnye kɔbẽ fɔletsa.

**XXI** Fɔɔdabe miawe? Ñya ne mi sekẽ mɔ katsei, mbɔɛɛ kĩ ñya ne ɔɔɔ mɔ akũ kadɔla bɔɛɛ?

## V

### *Mifɔne Adɔpaa Kabɔa Awe.*

**I** Finyaakĩ belamena kale kokooko kĩ adɔpaa deĩ ne mi kame mɔ ɔsĩ mɔ ɔsĩ kĩ ye odu leláa amamufɔ malo kame. Bele kĩ onyole odi mɔ ɔlega ɔtsɔ dzi.

**II** Lokɔa nde míapuli midela mi akũ ne ode? Kane kene kĩ ayɔlɔhɔ api mi lokɔa minye oti a kĩ ekena fɔtsa kpa kĩ odu a ne mi asoli katsu a kame.

**III** Tito kĩ nláa mi kame ne sukena kame malo ni, ndeĩ ne mi kame ne hũhũ kame. Ndzemo oti a, nko ye kɔtɔ kɔkɔɛ ne boe ɔlate Yesu dĩ akũ.

**IV** Nte mitsena ni, maana ne mi kame ne hũhũ kame ne boe ɔlate Yesu kɔbẽ a kĩ kɔana ne boe kame a sũ,

**V** mikɔa oti a mido ne Abonsam awe lokɔa ewola ye sukena a, ayekĩ ye hũhũ a aapuli ena kate ne boe ɔlate Luwi a akũ.

VI Fɔnéne fɔkpa mi kī miata akū! Minyina lɛgbā a kī, “Oyila kabii ne bodobodo mawɛ kame afɔ ye flee yavuya.”

VII Minye oyila kɔɛ a kī enye tɔkpa a ne mi kame lɔkɔa mi akū ekpale. Míadani mikena onuvoe lɔbɔ vɔɛ kī oyila leláa ye kame nde ayekī ñnyina kī mila a. Kitonekī bɛkɔ Kristo kī enye boe Wuda Katē kavelibi bɛkɔa bɛbɔa afɔlie ne boe lɔlɔ.

VIII Foesū mifɔ bɔnya boe Wuda Katē luwi a, nné mɔ abodoo kī edeī oyila kɔɛ kī enye tɔkpa mɔ ablo kakena, mbom bɔnya abodoo kī elá oyila kī enye tuwī kakena mɔ ɔnɔkɔali kadi.

IX Ne ovoli a kī ntsɛle nkpa mi kame a, mbi mi kī mitakɔa akū mibɔamɔ bati kī bideī adɔpaa.

X Finyaakī ni, nné amamufɔ a kī bideī adɔpaa, ñye bideī ane ngbā, ñye baye, ñye basum baviɔ a male. Nte miwe kī mianye mi akū ne be flee kame ni, kekɔ kene kī miane ne katinya kī kame kɔlaa.

XI Letsa kī matsa a nye kī mitakɔa akū mibɔamɔ oti kī yave ye akū kī ɔte odone lɛme yabɔa adɔpaa, ñye edeī ane ngbā, yasum baviɔ, ñye yave bati buī kpa, ñye yawuga bave ñye yaye. Mimo oti a na odu mitado awe minya malo.

XII-XIII Kitonekī fɔnyé yī adzuma kī madzɛmɔ bikī beláa asɔli a kame. Baguma aadzɛmɔ be. Lɛme kene kī miadzɛmɔ bikī bideī ne mi asɔli a kame, nde ayekī Katsɛle Kpalɛwa a lɛ kī, “Miblɔmena oti kpa a ne mi kame.”

## VI

*Kene Kī Bate Badone Belɔla Be Mɔawe Kayite.*

I Nte ɔdze wo ne mi kame odi mo ɔkoba ɔte odone kayite ni, nde su yakoa kale a ema amamufo folets a badzene, mo yaafɔ Baguma bati ledze kale a?

II Minyina ki boe a ki bonye Baguma bati a aayadzemo katinya kame? Nte mi aayadzemo katinya kame a, nde su milapuli midze folets a kubii kubii?

III Minyina ki boe aadzemo ode foto banyane leme mbɔe? Lokoa nde su mo milapuli midze katinya ki kame foto?

IV Nte folets a na odu ya ni, miakoa foe mikpa bati ki bela fodzakɔ ne asoli a kame malo ki bedze foe?

V Konyo kuwo mi! Mate kado ki oti moape aye ki enyina kadi dei ne mi kame ki yaapuli edze mi bate badone a kayite folets a.

VI Ki miakena foe lomo mbom a ni, ɔte odone akpa okoba kanamena folets a kadzeko kafɔ bikɔ betate bido a adze folets a!

VII Kale onokoli a nye ki ne ayeki miti miakoa folets a kanamena folets a kadzeko a atsa ki, obu sale ne mi aku. Folaale foba nte bekena tokpa ne mi aku lokoa mi ale kadima? Folaale foba nte mifone be awe bisisi mi mbom?

VIII Leme mi moawe a miakena tokpa ne mi bakoba aku, kasisi aku mo mi bawaɛ bate badone malo.

IX Minyina pefee ki tokpa bakenane tokpa a na odu lalana kanyakɔ ne Baguma legakanyakɔ a kame. Mitake mi aku, kitoneki bati ki baboa adopaa, iye basum baviɔ, iye bane konyo mo kotsɔ liti, batsole ki bawamo batsole mo banyole ki bawamo aku,

X ãye bati kã baye, ãye bikã bideĩ ane ngbã, ãye bikã bawuga bave, ãye bikã banye bati buĩ kpa ãye bablọfọ bayekpane ni, be kame odima lelãana kanyakõ ne Baguma legãkanyakõ a kame.

XI Ade aye mi kame badi mina miyatẽ a, leme finyaakĩ bevole titikpa ne mi akũ. Bekoa mi bido ne Baguma awe, bekena mi bati kpalewa ne boe Ọlate Yesu Kristo dĩ mọ Baguma Hũhũ akũ.

*Mikena Mi Akũ Yedede, Mikoa Obu Mikpa Baguma.*

XII Mi kame badi aale kã, “Bekpa yĩ osi kã nkena letsa nye letsa.” Oo! Nuwĩ fọane. Leme nné letsa nye letsa nene lekpa oti. Maapuli nle kã, “Bekpa yĩ osi kã nkena letsa nye letsa.” Leme nlãafõ letsa nye letsa lenya yĩ akũ.

XIII Oti bebã leme aale kã, “Funitsã waa fọkpa lupu ade lupu leme waa lekpa funitsã a.” Oo! Nuwĩ fọane. Leme Baguma aawọla foe nviã a. Ketáne kã bọakoa boe sukena bọkpa linyolewe mọ litsolewe, mbom kã bọakoa sukena busum boe Ọlate ade boe Ọlate leme adãmena se akũ a.

XIV Nde ayekĩ Baguma dzela boe Ọlate etomena kanokpa a, ade ayea yaakoa ye kobẽ edzela boe leme a.

XV Minyina kã mi sukena nye Kristo sukena a sidi. Fọnene kã makoa Kristo sukena seke sidi nkena otsole ọdọpaani sukena sukena a sidi? Ketáne kã fona lomo koũ!

XVI Mbọee minyina kã nte odi koa akũ eta otsole kã yaboa adọpaa ni, bemọ ye bekena sukena mọa? KatsELE Kpalewa a le kã, “Be bati nviã a baakena sukena mọa.”

**XVII** Leme oti kī ekwa ye akū emenamọ boe Ọlate ni, bemo ye bekenana ọmọa ne hūhū kame.

**XVIII** Mivele akū ne linyolewe mọ litsolewe tokpa ọwē! Titikpa bebā kī oti akena látamọ ye sukena, leme oti kī ebọa adọpaa titikpa a tamọ ye mọawe sukena.

**XIX** Minyína kī mi sukena nye asoli kọla kọkpa Hūhū Kpalewa a kī Baguma kpa mi, kī edeī ne mi kame leme a? Foesū nné mi awe la mi sukena mbom Baguma side sane.

**XX** Baguma se kọtọ kpale ne mi lolọ, foesū mikwa mi sukena mido ye obu.

## VII

### *Bekpa Kọde Ne Kọtsọ Mọ Konyọ Kadzi Akū.*

**I** Finyaakū maale kodzela ne foletsa a kī mitselẹ mikpa yī a akū. Fọnenẹ nte onyole odi tákọā ọtsọ.

**II** Leme ne kī linyolewe mọ litsolewe bọ paa sū ni, kene kī onyole nye onyole ekọā ọtsọ, ade kene kī otsole nye otsole leme edzi konyọ a.

**III** Ketáne kī onyole ekena ọtsọ be kawa lolọ ọsī, ade ayea ketáne kī otsole asī ọnyọ sekē kawa a. Kene kī bakena letsa sīwa lidi nye lidi bekpa be akū.

**IV** Otsole a sukena lenyé ye odi side, mbom ọnyọ side sane leme. Ade ayea onyole a sukena lenyé ye odi side, mbom senye ọtsọ leme side.

**V** Ọtsọ mọ ọnyọ betakena be kawa akū lolọ ọsī, mbọente binu be akū kayọ ade bewẹ leme kī bakwa loko lidi bekpa mpaebo. Leme ke liti a, kene kī bamuniki bidzi tọtsọ mọ tonyọ,

ayekĩ Abonsam leláafõ biwo ne sòhuie kame nte betápuli benya be akũ akũ.

**VI** Nle fukĩ nde osi kakpa aye ne mi kadzi kame, leme nné mbla yanε makpa mi.

**VII** Kufe maawe kĩ bati flee bidzi nde ayekĩ ndzi a. Leme odi nye odi deĩ futetsa fudi kĩ ete etomena Baguma sekẽ. Odi nye odi fude vemenana ne okoba fude akũ.

**VIII** Finyaa, mabi bakutse mo bakunawa kĩ fonene fokpa be fobẽ nte bidzi be odi nde ayekĩ yĩ odi ndzi a.

**IX** Leme nte beláapuli benya be akũ kõ ni, bekõã batsõ ãye bidzi fonyo, kitonekĩ kotsõ mo konyo kadzi nene fobẽ kĩ sukena kawε aakaha be.

**X** Ndeĩ mbla nkpa batsõ mo banyo. Mbla a lenyé yĩ ade, mbom boe Olate sekẽ eto. Ade ye nye kĩ otsole etasĩ onyo,

**XI** leme nte esĩ konyo ni, kene kĩ edzi ye odi, nte nné aye emuniki enaakpola onyo a. Ade ayea ketáfeta kĩ onyole leme asĩ otsõ a.

**XII** Mi bati nkaε a kõ ni, yĩ lamo be kabi, nné boe Olate. Nte okristoni deĩ otsõ kĩ enye omamuni, kĩ etuno kĩ badzimo akũ ni, onyole a etasĩ ye.

**XIII** Ade ayea nte otsole okristoni dzimo onyo kĩ enye omamuni, mo etuno kĩ bemo ye badzi ni, otsole a etasĩ ye.

**XIV** Kitonekĩ onyo a kĩ etáte edo a kena oti kpalewa ne Baguma anε, ne ayekĩ biboomu a sũ. Ade ayea otsõ a kĩ etáte edo a leme kena oti kpalewa ne Baguma anε ne ayekĩ bemo onyo a biboomu sũ a. Nte nné lomo ni, be babi a aakena



ndε amamufọ babi aye. Lεmε nε be ọmọa kakena sũ be babi kena batı kpalewa nε Baguma anε.

**XV** Lεmε nte fọya kĩ be kame odi kĩ etáte edo tátunọ kĩ yadzimọ ọto odone ni, yapuli edzakũ faa. Nte fọya lọmọ a ọte odone a deĩ osi kĩ yabọε ye osi, kitonekĩ Baguma we kĩ midzi nε lukudọ kame.

**XVI** Mi bate badone batsole a mite anε kĩ fọtsẽ mi akũ mi banyọ aapuli bedani be tọwọle kame. Ade ayea mi bate badone banyole mite anε kĩ fọtsẽ mi akũ mi batsõ lεmε aapuli bedani be tọwọle kame a.

*Midzi Nde Ayekĩ Mina Fọmọ Baguma Ve Mi a.*

**XVII** Finyaakĩ odi nye odi edzi nkpā ndε ayekĩ boe Ọlate kpa ye, ndε ayekĩ ena fọmọ Baguma ve ye a. Ade mbla kĩ matsa nε tesọli flee a kame a.

**XVIII** Nte ọti tsua lekpati fọmọ Baguma ve ye ni, fõ ena lọmọ. Nte etátsua lekpati fọmọ Baguma ve ye ni, etale kĩ yanaatsua lekpati.

**XIX** Kitonekĩ nte otsua lekpati ãye ọtátsua ni, fọtséla. Letsa a kĩ lisĩ nye kĩ akena nε Baguma mbla a akũ.

**XX** Foesũ odi nye odi ena ndε ayekĩ ela fọmọ Baguma ve ye a.

**XXI** Ọsate anε fọmọ Baguma ve nọ? Fọtséla. Lεmε nte ọna osi kĩ aanye nọ akũ nε tesate kame ni tsã ye akũ,

**XXII** kitonekĩ ọsate a kĩ boe Ọlate ve a né nε tetsate kame. Ade ayea ọti kĩ enyé ọsate fọmọ beve ye ni, ye malo edani ọsate ekpa boe Ọlate.

**XXIII** Baguma se kọto kpale nε mi lolọ, foesũ mibuki minyé basate mikpa batidziwa.

XXIV Nwaě amẹ, mi kame odi nye odi ẹna nde ayekĩ ẹla fọmọ Baguma ve ye a.

*Ayekĩ Bakunawa Mọ Bakutse Bidzi.*

XXV Finyaakĩ, ne fọletsa a kĩ mitsẹle ne bakutse akũ a ni, ntáte mbla ntomena boe Ọlate sekě. Leme ade yĩ kakona a, kitonekĩ ne ayekĩ boe Ọlate mọ yĩ konya sũ miapuli mite yĩ mido.

XXVI Ne yĩ kamọ onukpě mọ ayekĩ nviã katinya lamena ọsĩ kana sũ ni, fọneke kĩ oti edzi nde ayekĩ ẹla a.

XXVII Nte ọkọã ọtsọ ni tale kĩ asĩ ye. Nte ọtákoã ọtsọ ni, tale kĩ awe odi ọkọã.

XXVIII Leme nte ọkọã ọtsọ ni ọtákena titikpa, ade ayea nte odi dzi konyo ni, ye malo ẹtákena titikpa a. Leme ntáwe kĩ awo ne ọhau a kĩ ọtsọ mọ onyo amọ a kame.

XXIX Nwaě amẹ, letsa a kĩ matsa nye kĩ loko pii buki lewáa ne boe lotọ, fọesũ kito finyaa kanaa ni, banyole kĩ bekoã batsọ bidzi nde betákoã batsọ.

XXX Bikĩ babe ni, bidzi nde bati kĩ be akũ láko konya, bikĩ bameme ni, bekena nde kawọle láde be. Bikĩ beya fọtsa ni bekena nde nné be la fọtsa a kĩ beya a.

XXXI Bikĩ bitomena katinya kame fọtsa liti kĩ bawe kĩ foe flee fonya be fude ni, bidzi nde betsẹla katinya kame fọtsa akũ, kitonekĩ katinya kĩ lẹláana lómọ flee nde ayekĩ kẹla finyaa.

XXXII Maáwe kĩ ana ne ọhau odima kame. Kitonekĩ oti kĩ ẹtákoã ọtsọ ni, ẹkọa ye akũ flee ẹkpa Baguma adzuma kakena, ade yabọa mbodi kĩ yakena adzuma a edo Baguma kawọle a.

**XXXIII** Leme onyole kī ekōã ọtsō ni, yakona katinya kame fotsa akū, kitonekī yawe kī yado ọtsō kawọle.

**XXXIV** Ne foesū ye adzuni sē tisi nviã. Otsole kī etádzi konyo ñye oyitsō kī enyína onyole ni, ekōa Baguma adzuma ete ne ye akū, kitonekī ewe kī yakōa ye sukena mo hūhū flee edzi nkpā yedede. Otsole kī edzi konyo ni, ekōa ye akū ekpa katinya kame fotsa kitonekī yawe kī yado onyo kawọle.

**XXXV** Male fukī bame flee kitonekī mawe kī makpa mi kabumena. Ntawe kī miana nē kasuli kame, mbom mawe kī mikena letsa a kī lenene mo likī lefeta, lokōa mikōa mi akū mikpa Baguma osum, kī kavia katse leláa foe akū.

**XXXVI** Nte onyole tinya oyitsō mo emó kī yaápuli epi ye akū, ñye emo kī loko lamena katē ni, baapuli bekōã akū. Fonyé titikpa nte foya lomō.

**XXXVII** Leme nte onyole tinya oyitsō, mo ekona ne ye kame kī yaapuli epi ye akū, kī baadzimo akū kokooko ni, ekena foe kakena wī.

**XXXVIII** Foesū onyole kī ekōã ọtsō ni, ekena kakena wī, leme onyole kī etákoã ọtsō ni, ye fude nene fobē kọlaa.

**XXXIX** Otsole kī edzi konyo ni ebuki elá osi kī yadzi konyo bebā. Leme nte onyo a ku ni, edeĩ osi kī yadzimo onyole a kī yawe. Kene kī onyole a enya ọte odone.

**XL** Leme nte edzi nde okunawa aye ni, yaamo kawọle eba. Ade yĩ kakona a, ade mate kado kī ade aye nye Baguma Hūhū a kakona kī ekpa yĩ a.

## VIII

*Bekpa Kɔde Ne Baviõ Funitsã Akũ.*

<sup>I</sup> Finyaa, mawɛ kĩ mabi mi litsedi ne fɔletsã a kĩ mitsɛle ne funitsã a kĩ bekɔa bebɔa afɔlie bekpa baviõ akũ. Boe flee bɔale kĩ bunyina kadi. Lemɛ bunyina kĩ kadikanyi kĩ afõ oti adɛla ye akũ ne ode. Letsã a kĩ lakpa boe kobẽ nye ɔɔ.

<sup>II</sup> Nte odi kɔna kĩ enyina fɔtsã ne litsedi akũ paa ni, ɛtãmo foe kamɔ wĩ ndɛ ayekĩ kenɛ kĩ fɔna a.

<sup>III</sup> Lemɛ nte odi awɛ Baguma ni, Baguma lemɛ nyina ye.

<sup>IV</sup> Foesũ ade letsã a kĩ mabi mi ne funitsã kĩ bekɔa bebɔa afɔlie bekpa baviõ akũ a. Bunyina kĩ baviõ nye fɔtsã a kĩ bekɔa awɛ bemɛ, kĩ fɔlã nkpã, kitonɛkĩ Baguma odi pe deĩ nkpã.

<sup>V</sup> Titɔ kĩ bati alɛ kĩ baviõ deĩ ne ode mo tite akũ, kĩ baviõ kumekumɛ kĩ mo be balate deĩ malo ni,

<sup>VI</sup> boe kɔ bunyina kĩ Baguma moape deĩ. Ade ye nye boe ɔlegã kĩ ebɔa letsã nye letsã, ade budzi bɔkpa ye a. Boe ɔlate kĩ enye Yesu Kristo moape lemɛ deĩ. Ade ye akũ Baguma tsã ebɔa letsã nye letsã, kĩ fɔtsẽ ye akũ budzi nkpã.

<sup>VII</sup> Lemɛ nné odi nye odi nyina ɔnokɔali fɔletsã kĩ. Baviõ akũ fɔletsã nya bati badi kamekame limii kĩ keyawo nviã kĩ nte benya funitsã kĩ bekɔa bebɔa afɔlie bekpa baviõ pe bakɔna kĩ baviõ funitsã fɔanɛ. Ne kĩ betábo anɛ ne be katekado kamɛ sũ ni, bakɔna kĩ funitsã a do be efĩ.

<sup>VIII</sup> Funitsã lelápuli fɔlɔla bomo Baguma kayite. Boláayɛla letsama nte botánya ade ayea bolána nfaso adima nte bonya lemɛ a.

<sup>IX</sup> Lemɛ midã kadã wĩ lɔkɔa mitafõ mi lekɛnana ne akũ akũ kadzi kamɛ lefõ bikĩ betábo anɛ ne

be katekado kame liwo ne tɔkpa kame.

**X** Bɔe foe kī oti kī etábo ane ne ye katekado kame mó kī nɔ a kī onyina kadi a odzi anya ne kuviõla. Nné kɔbẽ ado ye kī enya funitsã kī bekɔa bebɔa afɔlie bekpa baviõ?

**XI** Awaẽ ɔte odone a kī ye katekado tábo ane, leme Kristo ku ne ye lolɔ a ni, yaawɔ ne nɔ kadi a kī onyina a sũ.

**XII** Miafõ mi bawaẽ bate badone a kī betábo ane ne be katekado kame a, akena titikpa ne Kristo akũ, kitonekĩ miado be kɔbẽ bakena letsa kī bete bido kī fɔnéne.

**XIII** Foesũ nte funitsã fudi kanya aafõ nwaẽ lekena titikpa ni, nláanya funitsã a na da, ayekĩ eláawo ne tɔkpa kame.

## IX

*Paulo Kena Adzuma Kĩ Jhe Tána Ne Foe Kame.*

**I** Miakɔna kī ñnyé oti kī edzí ye akũ akũ mbɔee? Miakɔna kī ñnyé foto ɔnyane mbɔee? Miakɔna kī ntákɔa ane mmó boe ɔlate Yesu mbɔee? Nné mi nye adzuma a kī nkená nkpa boe ɔlate a foe akũ nfasɔ?

**II** Nte bati bebã támo yĩ biyi ɔsũ nde foto ɔnyane aye ni, mi kɔ mite yĩ. Kitonekĩ ayekĩ miawe midzi nkpã ne boe ɔlate dī akũ a atsa kī ñnye ye foto ɔnyane.

**III** Nte bati ate yĩ atsindze ni, ade limii manye yĩ akũ onukpẽ a.

**IV** Bolá osi kī bakpa boe funitsã mo mui ne adzuma a kī bɔakena a sũ mbɔee?

**V** Bólá osi kī bakpā boe batsõ bate badone bõnamena osi akū nde ayekī foto banyane bebā, Petro mō boe Ɔlate bawaē a akena mbõee?

**VI** Mbõee kī bõmō Barnaba odi pe kene kī bõkena adzuma bõkõa bõdāmena boe akū?

**VII** Sodzani ɔdabe adāmena ye mōawe akū nte edeī ne kawūkanõ adzumamu? Okuani ɔdabe ane koba kī yaánya funitsā a kī fõne a? Iye owei adõla ɔnantsue kī yaámõa ye teme mui badi?

**VIII** Maátsa fõtsa ne bati kakõna onukpē. Ade aye mbla a leme tsa kale mōape a.

**IX** Betselē ne Mose mbla ovoli a kame kī, “Mitasui ɔyae kī minee miakena adzuma ne koba a onukpē.” Baguma tsela ɔyae odi akū mbõee?

**X** Nné boe sū ele kale a na mbõee? Ɔnõkõali ade boe kale sū betselē foe a. Kene kī ekī yadu mō ekī yakpõta a flee bakena adzuma a mō kõnete kī baana be tsefā ne funitsā a kī fõane a kame.

**XI** Budu hūhū kame fõtsa ne mi kame. Nte mi malo mikpa boe katinya kame fõtsa a ni, miyela osi?

**XII** Nte bati bebā deī osi kī bana nfasõ adi bitomena mi sekē ni, kekõ kene kī boe bõana foe butomena mi sekē, fublusu malo.

Leme bõtākõa boe osi kawa a na bõkena adzuma. Mbom bõkõa letsa nye letsa bute ne boe mōawe akū ayekī letsama lelāanya mbetahu fõkpa boe ne Kale Wī a kale ne Kristo akū.

**XIII** Minyina yededeede kī be a kī bakena adzuma ne Baguma Asõli Kõla kame ana be funitsā katomena Asõli Kõla a kame, ade bikī babõa afõlie ne afõlie de akū a leme ana afõlie fõtsa a foe tsefā a.

**XIV** Ade aye boe Ɔlate leme le eyi kī be a kī bade letsā ne Baguma fõletsa akū ni, kene kī bena be

kanya bitomena letsã kade a kame.

**XV** Leme yĩ kõ ntákena osi kĩĩ akũ adzuma, ade nlámèna mi ovoli kĩĩ katsèlè kĩ mikèna nè foe akũ mikpa yĩ a. Nte foe lómò sũ ni, maaku mbom! Kitonekĩ ntáwè kĩ odi ekòa letsa kĩ mapia nè de akũ a ekèna fòtsa pupulidza.

**XVI** Nlá osi kĩ mapia nè kĩ made letsã nè Kalè Wĩ a akũ sũ. Fonye òhè fòkpa yĩ kĩ ndè letsã a, ade Baguma aavele yĩ sòtò mò òsĩ mò òsĩ nte ntálè Kalè Wĩ a lemè.

**XVII** Nte yĩ m̀awè kawè onukpè makèna adzuma kĩĩ ni, maadã kĩ bise yĩ foe kòtò. Leme makèna foe ndè letsa a kĩ bihihiè bèkpa yĩ kĩ nkèna, kitonekĩ fonye adzuma kĩ Baguma hihie ekpa yĩ.

**XVIII** Foesũ litsa kòtòkase maana? Yĩ kòtòkase nyè kĩ made letsã nè Kalè Wĩ a akũ faa, ade maáte anè kĩ maatsã osi odi akũ nna foe akũ kòtòkase kudi a.

**XIX** Ndzi yĩ akũ akũ ade ãnyé òsate nkpa odima a. Leme nkòa yĩ akũ nkèna oti kĩ yasum odi nyè odi ayekĩ maapuli ãnyè bati pii nkpa boe Òlate.

**XX** Lòkò a kĩ nkèna adzuma nè Yudafò kame a, ndzi nkpã ndè Yudani ayekĩ maavele be mma boe Òlate. Titò kĩ nláa Mose mbla kayò malo ni, ndzi nkpã ndè bikĩ bideĩ nè mbla kayò, ayekĩ maanyè bikĩ bideĩ nè mbla a kayò nkpa boe Òlate.

**XXI** Ade ayea kĩ makèna adzuma nè bikĩ benyé Yudafò kame a, ndzi nkpã ndè oti kĩ enyé Yudani. Ntákèna nè Yudafò mbla akũ ayekĩ maana bati nkpa boe Òlate. Leme fukĩĩ látsa kĩ mpu Baguma mbla a. Ònòkòali a nyè kĩ ndeĩ nè Kristo mbla a kayò.

**XXII** Nte ndeĩ ne bikĩ be katekado tabo ane kame ni, makena yĩ akũ nde be kame om̄oa aye, ayekĩ maavele be nkpa boe Olate. Matsã osi nye osi akũ kakena om̄oa m̄o odi nye odi ayekĩ maavele be kame badi nkpa boe Olate.

**XXIII** Makena fukĩĩ bame flee ne Kale Wĩ a sũ, ayekĩ yĩ malo maana foe akũ nhila.

**XXIV** Minyina yededeede kĩ bati pii adã akũ ne atse kalo kame, leme be kame om̄oape anya akũ kate foe akũ lob̄oe. Foesũ miwula atse ayekĩ míapuli minya akũ mite foe akũ kotokase a.

**XXV** Odi nye odi kĩ eman̄e akũ ekpa atse kalo ni, yak̄oa ye akũ kado ne mbla m̄o osĩ m̄o osĩ kayo ayekĩ yaana legãb̄oe a kĩ de k̄õ laawo. Leme boe k̄õ b̄oaman̄e akũ ayekĩ bóana legãb̄oe a kĩ leláawo da.

**XXVI** Foesũ mawula atse kanaa kpĩĩ kĩ manaat-sua ow̄ẽ a. Ade foesũ nla nde fukpeni ob̄oan̄e kĩ yaáta fukpeni ne owe kame aye aye a.

**XXVII** Maf̄õ fukpeni awo yĩ akũ ayekĩ yĩ sukena aapuli sedza sekpa lubo kam̄o. Kitonekĩ nte made letsã ne Kale Wĩ a akũ kakpa bati bebã ni, ntáwe kĩ beyaanye yĩ ne boe a kĩ b̄oadã akũ ne atse kalo kodza a kame.

## X

### *Paulo Kpa Kode Ne Baviõ Kasum Akũ.*

**I** Nwaẽ am̄e, mawe kĩ mikai letsa a kĩ leya ne boe bawanyo a kĩ bitóm̄o Mose a akũ. Be flee b̄ena ne luflututu a kob̄ẽ kayo ade bet̄sã Mpo Ngbã a kame bene yededeede a.

**II** Baguma k̄oa luflututu m̄o mpo mui ekena be mui kawola aman̄e nde bati kĩ bitom̄o Mose aye.



III Be flee benya hūhū kame funitsā moape a,

IV ade bemoa hūhū kame bave moape a leme a. Bemoa mui bitomena awāwā hūhū de a kī litomō be a kame. Ade de kī nyē Kristo awe a.

V Leme ne loko a na kame ni, Baguma támō kawole ne be pii akū. Ne foesū biku ne kōsa kame.

VI Finyaakī ni, fotsa kī bame flee nyē nfantuhū fokpa boe ayekī fōaboa boe kōkō, kī bōlátomō fotsa kpa liti nde ayekī bekēna,

VII ĩye bōakoa boe akū bōkpa baviō kasum nde ayekī be kame badi kēna a. Katsēle Kpalēwa a le kī, “Bati a dzi banya luwi, leme be kanya mō kamōa dani fokēna bave kawuga, mō litsolewe mō linyolewe kakēna.”

VIII Kētāne kī bakō boe kōtō ne litsolewe mō linyolewe kakēna kame, nde ayekī be badi kēna. Ne foesū be kame bati mpim tēya elale ku luwi moape.

IX Kētāne kī bōaso boe ōlate bōdā nde ayekī be kame badi kēna a, ne foesū bōe dō be biku.

X Mitafō buyidza bōdza ne Baguma akū nde ayekī be kame badi kēna, ne foesū Wuda Ode foto onyane yawola be.

XI Fukī bame flee ya ne be akū ayekī bati bebā aakole fotsa bitomena foe akū. Betsēle foe biyi ayekī bōakoa bōkpā boe akū, kitonēkī budeī ne loko a kī katinya kame kawūna fuā kiyua a kame.

XII Odi nyē odi kī yakōna kī edzē pintii ni, edā kadā wī ayekī eláato.

XIII Kaso kadā kadi nyē kadi kī keya ne nō akū ni, ade foe odu aya ne bati bebā akū a. Leme Baguma akēna ne ye kale akū, ade ke eláafō kaso

a na lɛba nɔ kɔbɛ̃ a. Nɛ kasɔ a kamɛ ni, yaakpa mi kɔbɛ̃ ayekĩ míapuli midza nɛ foe kamɛ, mipuli minya foe akũ lɛmɛ.

**XIV** Foesũ, nwaɛ amɛ, mivɛlɛ mi akũ nɛ baviõ kasum ɔwɛ̃.

**XV** Mabi mi fɔletsɔ ndɛ bati kĩ binyina kadi, foesũ mikɔna fɔletsɔ a kĩ nɛ a akũ midã.

**XVI** Kɔɔpu a kĩ bɔalɛ kanyɛ Baguma kɔlɛ a nyɛ boɛ ɔlate babɔanɛ. Ntɛ buhila kayɛi a na, bɔmɔa bavɛ a ni, bɔmɔ Kristo bɔkɛna ɔmɔa. Ntɛ bɔanya boɛ ɔlate funitsã kpalɛwa ni, fɔatsɔ kĩ bɔmɔ Kristo bɔkɛna ɔmɔa.

**XVII** Tito kĩ bɔpɔnɛ malo ni bɔkɛna oti mɔa, kito nɛ abodoo mɔapɛ a kĩ boɛ flɛɛ bɔsɛ̃ bɔanya a sũ.

**XVIII** Mikɔna Israelfɔ midã. Bɛ a kĩ benya funitsã a kĩ bɛkɔa bɛbɔa afɔliɛ bɛkpa Baguma a, bɛkɛna ɔmɔa mɔ Baguma.

**XIX** Foesũ katsa matsa kĩ baviõ ãyɛ fɔtsa a kĩ bakɔa kabɔa afɔliɛ kakpa bɛ a nyɛ fɔtsa sãwa fudi mbɔɛɛ?

**XX** Oowo! Letsa a kĩ matsa a nyɛ kĩ fɔtsa a kĩ bɛkɔa bɛbɔa afɔliɛ bɛkpa baviõ ni, bɛkɔa foe bɛkpa hũhũ kpa, lɛmɛ nnɛ Baguma bɛbɔa bɛkpa. Ntãwɛ kĩ miakɛna ɔmɔa mɔ hũhũ kpa.

**XXI** Ketãnɛ kĩ miãmɔa mui nɛ boɛ ɔlate kɔɔpu kamɛ lɔkɔa mibuki minaamɔa nɛ hũhũ kpa kɔɔpu lɛmɛ kamɛ, ãyɛ minya nɛ boɛ ɔlate opunu akũ lɔkɔa minaanya nɛ hũhũ kpa opunu akũ lɛmɛ.

**XXII** Miawɛ kĩ boɛ ɔlate ɛna kalɔkpa, ɛnɔ linekɛ lɛmɛ mbɔɛɛ? Bɔakɔna kĩ budeĩ kɔbɛ̃ bɔbɛ̃ yɛ mbɔɛɛ?

**XXIII** Baboà legbã kī, “Bekpa boe osi kī bōkena letsa nye letsa.” Fonye onokoali, leme nné letsa nye letsa nene lekpa boe. “Bekpa boe osi kī bōkena letsa nye letsa.” Leme nné letsa nye letsa deĩ nfaso lekpa boe.

**XXIV** Ketáne kī oti akona ye odi kale, mbom kene kī yakona bati bebã kale akū.

**XXV** Mideĩ osi kī mianya sekena sisi nye sisi kī bano ne koyaato. Mitafõ foha mi towole ãye mivia nte se akū kpale ãye setákpale.

**XXVI** Kitonekī Katsese Kpalewa a le kī, “Baguma la katinya mo letsa nye letsa kī lideĩ ne ke kame a.”

**XXVII** Nte oti kī enyé ote odone ve no kī yaanya mó otuno onaa ni, nya funitsã a kī ete opunu ekpa no a, leme tavia ye otse nte foe akū kpale ãye fotákpale.

**XXVIII** Leme nte odi bi no kī, “Dã, bekpa funitsã a na bebõa afolie bekpa baviõ” kekõ tanya foe ne ayekī foláaha oti a owole.

**XXIX** Kitonekī nné no a kī onya a owole fõaha, mbom fõaha oti a kī ebi no a. Odi aavia kī, “Nde sũ nte ndeĩ osi kī makena litsedi mo fõaha odi owole?”

**XXX** Nte ãnye Baguma kole ne funitsã a kī ekpa yĩ a akū ni, nde sũ odi ale kodzela etia yĩ?”

**XXXI** Leme mite ane kī letsa nye letsa kī miakena, nte fonye kanya ãye kamõa malo ni mikena foe mikõa mimu Baguma.

**XXXII** Midzi nkpã ayekī miláavele ohau adima mikpa Yudafo ãye bikī benyé Yudafo mo be a kī benye Baguma asoli bati a.

XXXIII Mikena nde ayekĩ nlamena kakena. Mboá mbodi kĩ makena letsa nye letsa fuwo odi nye odi ane. Maákona yĩ akũ mbom makona bati flee be tuwĩ akũ ayekĩ baana nkpā kĩ elá kawūna a.

## XI

I Mikole yĩ obla mikena nde ayekĩ yĩ malo makole Kristo obla kakena a.

### *Kristo Nye Lolọ Ekpa Odi Nye Odi.*

II Mamu mi ne ayekĩ mite ane ne yĩ akũ luwi daa mo ayekĩ mitomo fotsa flee a kĩ ntsa mi a.

III Leme mawe kĩ minyi kĩ Kristo nye lolọ ekpa odi nye odi. Onyole nye otsõ lolọ ade Baguma leme nye Kristo lolọ a.

IV Foesũ nte onyole kĩ yaboa mpae ñye yale Baguma foletsa ne asoli kola kame sua ye lolọ ni, edo Kristo konyoã.

V Leme otsole kĩ yaboa mpae ñye yale Baguma foletsa ne asoli kola kame, tásui duku ne lolọ ni, edo onyo konyoã. Ntsitsemu leláa bemọ otsole kĩ ekpa lolọ tsolitsoli kayite.

VI Nte otsole tásui duku ne lolọ ni, kene kĩ ekpeli tọlọ. Leme ne kĩ fonye konyoã nte otsole kpeli tọlọ ñye ekpa lolọ sũ ni, kene kĩ esui duku ne lolọ.

VII Fótásĩ kĩ onyole asua lolọ kitonekĩ ela nde Baguma kutitse mo ye kukũkpale. Leme otsole kõ nye onyole kukũkpale.

VIII Kitonekĩ Baguma táboa onyole etomena otsole kame, mbom eboa otsole etomena onyole kame.

**IX** Bεtábɔa onyole bεkpa otsole nε ye otsole a kale sũ, lεmε bεkεna otsole bεkpa nε onyole a kale sũ.

**X** Nε ode fɔtɔ banyane sũ ni, kεnε kĩ otsole esui duku nε lɔlɔ εkɔa εtsa kĩ edeĩ nε ɔnyɔ kɔbẽ kayɔ.

**XI** Titɔ kĩ fɔla lɔmɔ malo nε ɔmɔa kakεna mɔ boe ɔlate sũ ni, otsole lĩdzi ye akũ akũ, ade onyole lεmε lĩdzi ye akũ akũ a.

**XII** Kitonεkĩ ndε ayekĩ bεbɔa otsole bitomεna onyole kame a, ade aye a bεma onyole bitomεna otsole kame a. Lεmε letsa nye letsa to Baguma sekẽ.

**XIII** Mi mɔawe mikona midã nte fɔnεnε kĩ otsole abɔa mpae εkpa Baguma nε kanade, kĩ εtásui duku nε lɔlɔ.

**XIV** Ayekĩ Baguma bɔa katinya kame malo atsa boe litsedi kĩ fɔnye kɔnyɔã nte onyole deĩ lɔlɔ tɔlɔ gεlεεlε.

**XV** Lεmε tɔlɔ gεlεεlε nye akũ obu fɔkpa otsole. Bεkpa ye tɔlɔ gεlεεlε kĩ εkɔa εkεεlε ye akũ.

**XVI** Lεmε nte odi awe kĩ yate atsindze nε fɔletsa kĩ akũ ni, letsa a kĩ maale nε foe akũ nye kĩ boe ãye Baguma tεsɔli a buki telá amanie bεbã adima.

*Osi a Akũ Kĩ Kεnε Kĩ Bɔnya Boe ɔlate Funitsã.*

**XVII** Nε kɔde a kĩ makpa mi finyaa kame ni, maámu mi kitonεkĩ nte mikpɔta kĩ miasum Baguma ni, miakεna mi akũ tɔkpa kaba tuwĩ.

**XVIII** Kale katɔnyade ni, nnu kĩ nte mikpɔta ndε asoli bati aye ni, miasẽ mi akũ. Nte fɔletsa kĩ fudi ndo.

**XIX** Fusĩ kĩ kasẽ kεna nε mi kame ayekĩ bóamɔ yededeede bikĩ badi ɔnɔkɔali nε mi kame.

XX Nte mikpota ne kako moa ni, nné boe Olate Funitsã kpalewa a mianya.

XXI Kitonekĩ nte mianya ni, odi nye odi aboe ye funitsã kanya. Fofõ badi lána kanya, ade badi leme awuga bave.

XXII Milá toto kĩ mianya mimoa ne te kame mboue? Kawe miawe kĩ miasupa Baguma asoli a, mido ahiãfo konyoã leme mboue? Litsa miwe kĩ mbi mi ne fukĩ akũ? Miwe kĩ mmu mi mboue? Oowo! Fukĩ kõ nláamu mi.

XXIII Kitonekĩ letsa a kĩ nte ntomena boe Olate sekẽ a, ade foe ntsa mi a. Lenye a kĩ ke mo benye boe Olate Yesu bekpa a, eboe abodoo,

XXIV ade enye kole, eyele ye ele kĩ, “Ade yĩ sukena kĩ nkoa maboa afolie nkpa mi a. Mikena fukĩ mikoa mikai yĩ.”

XXV Ade ayea kĩ benya biyua a, eboe koo pu ade ele kĩ, “Koo pu kĩ nye nhihie voẽ kĩ bekoa yĩ baboane bisui. Loko nye loko kĩ miamoa bave kĩ ni, mikena foe mikai yĩ.”

XXVI Foaatsa kĩ loko nye loko kĩ mianya abodoo, miamoa bave ne koo pu kĩ kame leme ni, milamena letsã kade ne boe Olate wuda akũ, kenaawo loko a kĩ yaabuki eya.

XXVII Foesũ nte odi nya boe Olate abodoo, emoa koo pu kĩ ne osi kpa akũ ni, baako ye koto kĩ efum ne boe Olate sukena mo ye baboane akũ.

XXVIII Ne foesũ kene kĩ odi nye odi ekona ye owole kame fomõ yaanya funitsã, emoa bave ne koo pu a leme kame.

XXIX Kitonekĩ nte odi táyi boe Olate baboane mo sukena osũ kĩ fonye fotsa kpalewa fomõ enya ãye

emọa foe ne osi kpa akū ni, ewele kadze eko ne ye akū.

**XXX** Ade foesū mi pii miaso ade milá akū osí a. Mi kame bati pii leme ku.

**XXXI** Nte bonya loto bonaa boe towole kame ni, Baguma leláadzemo boe.

**XXXII** Leme nte boe Olate adzemo boe, ewele boe soto leme ni, yalola boe ayekí Baguma leláako bomo bikí betáte bido a flee koto ekpota.

**XXXIII** Foesū nwaë ame, nte miyakpota kí mi-anya ni, midzole mi bawaë.

**XXXIV** Nte kole ako odi ni, enya ne kola ayekí nte miyatsena ne Baguma kola kame ni owula leláana kadze ekpa ye akū. Nte ñya ni, maade mi ne foletsa bebā a kí fute a akū.

## XII

### *Futetsa a Kí Futo Hūhū Kpalawa a Sekē.*

**I** Nwaë ame, finyaa ni mawe kí minu Hūhū kame futetsa a kí mitsela mivia akū foletsa kayo a yededeede.

**II** Minyina kí fomo midani mikena bate badone a, mitsā tisi pii akū ade mikoa mi akū mikpa baviō kí báale kodzela kasum a.

**III** Foesū mafō minyi kí nte odi koa Hūhū Kpalawa kobē yale kodzela ni, eláale kí, “Yesu, koa ne ke a!” ade odima leme leláapuli ele kí, “Yesu nye boe Olate,” nte Hūhū Kpalawa kobē leláa ye kame.

**IV** Futetsa futefute deí leme Hūhū Kpalawa moape a lekpa foe flee.

V Tisi pii deĩ kī te akū boatsā kakena Baguma adzuma, lẹmẹ ade boe Ọlate mọape a boasum a.

VI Ade ayea tisi pii deĩ kī Baguma atsā kakpa bati kọbē bakena fọtsa, lẹmẹ Baguma mọape akpa kọbē a flee.

VII Baguma kọa Hūhū Kpalẹwa etsā bati akū bakena tuwī fone libi fọkpa bati flee.

VIII Hūhū Kpalẹwa a apuli kakpa oti mọa kọbē ẹlẹ kọdzela mọ nyansā, ade Hūhū Kpalẹwa mọape a akpa oti bebā lẹmẹ kọbē ẹlẹ kọdzela mọ kadikanyi a.

IX Hūhū Kpalẹwa mọape a akpa oti mọa katekado baū. Ye mọape a yakpa oti bebā fọsọ katsa kọbē.

X Hūhū Kpalẹwa a akpa oti bebā kọbē kī ẹkena awāwā fọtsa, odi bebā lẹmẹ kī enye Baguma onukpē. Yakpa oti mọa kọbē kī epuli ẹlẹ kọdzela nẹ tide ahọlọ ahọlọ kame, ade yakpa odi bebā lẹmẹ kọbē kī yapuli enye tide a kayọ, oti bebā kọbē kī epuli enyi nte futetsa kī to Hūhū Kpalẹwa a sekē ãye fotáto ye sekē.

XI Hūhū Kpalẹwa mọape kī a akena fọtsa a flee, ade yakpa odi nye odi futetsa nde ayekī yawe a.

### *Oti Deĩ Akū Fọtsa Kī Fọakena Fọtsa Futefute.*

XII Otidziwa kutitse a deĩ akū fọkọ futefute, lẹmẹ foe flee fonye oti mọape. Titọ kī kuti a deĩ akū fọtsa pii malo ni, foe flee fọkena oti mọa. Ade aye Kristo lẹmẹ la a.

XIII Boe badi bonye Yudafọ ade badi lẹmẹ nye bikī benyé Yudafọ a. Badi nye basate ade badi lẹmẹ dzi be akū akū a. Lẹmẹ Hūhū Kpalẹwa a wola boe flee mui nẹ Kristo kame, bọkena omọa



ne Hũhũ Kpalɛwa mɔape a kame. Boe flee bɔte Hũhũ Kpalɛwa mɔape a mui bɔmɔa.

**XIV** Kitonekĩ otidziwa kutitse a lenyé fɔtsa fɔmɔape, mbom kudeĩ fɔko ahɔlo ahɔlo.

**XV** Nte kɔbɔa le kĩ, “Nné awe mane sũ ñnyé kutitse a seke sidima” a, foe kale lɔmɔ lɛláafɔ kĩ kɔbɔa buki kɔnyé kutitse a seke sidi.

**XVI** Nte sɔto lɛme le kĩ, “Nné linebi mane sũ ñnye kutitse a seke sidima,” foe kale lɔmɔ lɛláafɔ kĩ sɔto buki senyé kuti a seke sidi.

**XVII** Nte kutitse a flee nye linebi odi ni, kɔláapuli kunu fɔko. Nte kutitse a flee nye sɔto odi ni, kɔláapuli kɔte fɔtsa nfiã.

**XVIII** Lɛme Baguma bɔa boe kutitse mɔ foe akũ ahɔlo ahɔlo, ade edo fudi nye fudi ne awã kĩ yawe a.

**XIX** Nde otidziwa kuti a aana nde akũ fɔtsa mɔape fɔane?

**XX** Oti akũ fɔko futefute deĩ lɛme kutitse mɔape kɔane.

**XXI** Foesũ linebi lɛláapuli libi awe kĩ, “Ntásĩ nɔ!” Lɔlo lɛme lɛláapuli libi seneta kĩ, “Ntásĩ nɔ!”

**XXII** Oti akũ fɔko a kĩ fɔadã nde fɔlá akũ ɔsĩ a, ade foe mbom akũ lisĩ boe a.

**XXIII** Ade ke fɔko a kĩ bɔakona kĩ fɔtáte koya a, ade foe bɔakpa obu kaba a. Fukĩ fɔále kadã a, ade foe bɔakɔla kaba a.

**XXIV** Boe akũ fɔko a kĩ fɔale kadã a tásĩ akũ kadãmena. Baguma awe boomu akũ fɔko a flee ade edo obu ne fukĩ obu lɛláa foe akũ,

**XXV** ayekĩ boe kutitse a lɛláasẽ koe akũ. Baguma we kĩ fɔko futefute a fɔdãmena fɔkɔba akũ pɛpɛpɛ.

XXVI Nte oti kako kadi aso ni, foko nkae a leme amo lubo kabumo foe. Nte bido kako kadi anunyam ni, foko nkae a leme amo kawole kabumo foe.

XXVII Finyaakĩ mi a flee mikpota minye Kristo kutitse a, ade mi kame odi nye odi nye kutitse a seke siwa sidi a.

XXVIII Baguma kɔa badi edzela ne ye bate badone onukpẽ. Bekɔa kadzakõ katonyade bekpa foto banyane, kayade bekpa bikĩ benye Baguma onukpẽ banyene, ade kalalede a naa fotsa batsane sekẽ a. Ke liti Baguma kɔa kadzakõ bebã ekpa bikĩ bakena awãwã fotsa, bikĩ bideĩ kɔbẽ kĩ batsa foso, bikĩ babumena bati, bikĩ banya bati loto ne tudzuma kakena kame, mo bikĩ bale kodzela ne tide aholo aholo kame.

XXIX Nnẽ bati flee nye foto banyane iye kĩ benye Baguma onukpẽ banyene iye fotsa batsane. Ade nnẽ bati flee deĩ kɔbẽ kĩ bakena awãwã fotsa a.

XXX Nnẽ bati flee deĩ kɔbẽ kĩ batsa foso, iye bale kodzela ne tide aholo aholo kame iye banye tide a kayo.

XXXI Ne foe flee kame a, mitomo futetsa a kĩ fote kɔya foba flee a liti.

Le me finyaakĩ maatsa mi fukĩ fobẽ a flee.

## XIII

### *Paulo Tsa Letsa Kĩ Lenye Odo.*

<sup>1</sup> Nte mapuli kale batidziwa mo ode foto banyane flee tide, mo bati kawe lelãa yĩ kame ni, kekõ yĩ kodzela kale la nde lowoda iye odoũ kĩ yanẽ kooba kasĩna ato.

II Nte ndeĩ kobě kī manye Baguma onukpě, ãye ãnyina fotsa kolawa mo kadikanyi flee, ãye nte ndeĩ katekado kī maapuli ndzela oto ne ye katzakō, mó bati kawe leláa yĩ kame ni, kekō ãnyé letsama.

III Nte nkwa yĩ akū fotsa flee nte ahiãfo, ãye nte nkwa yĩ akū mboá afolie kī bipila mo nte bati kawe leláa yĩ kame ni, nlá nfaso adima.

IV Odo deĩ owole boee edeĩ seme kale leme. Odo lelá anengbā, yaátui owole ade yaáta akū leme a.

V Odo lákena fonyoãtsa, yaáwe ye odi fude, yaána kalokpa, ade yaápi tokpa kado ne owole kame a.

VI Odo lámo kawole ne tokpa akū, mbom yamo kawole ne onokoli kale kame.

VII Akpo láveli odo, yaákpa loló ne ye katekado kame, edeĩ konete luwi nye luwi ade yadza pintii ne letsa nye letsa kame a.

VIII Odo lelá kawūna da. Baguma onukpě kanye aayatě, kodzela kale ne tide aholo aholo kame mo kadikanyi deĩ, leme loko aaya kī foe flee fóatsua,

IX kitonekī boe kadikanyi mo boe Baguma onukpě kanye a leme tákpola fuyua a.

X Leme nte fotsa a kī fokpola yawo oto ni, futetsa kī flee aatě.

XI Loko a kī nna ne tibisě kame a, nle kodzela, mboe adzuni, mbu loló kame nde obisě aye. Leme kī mbo ane ndani onokōě ni, nfone tibisě kame fotsa flee awe.

XII Finyaakī boamo fotsa futufutu nde ayekī fola ne ahuhoe kame. Leme ke liti ni bóayamo letsa nye letsa ane mo ane. Letsa a kī ãnyina

finyaa ni, fọtákpọla fuyua, lẹmẹ liti maamọ foe yededeede nde ayekĩ Baguma nyina yĩ a.

XIII Nẹ foe kame a, fọtsa elale deĩ kĩ foe kọ fọawa daa. Ade foe nye katekado, kọnẹte mọ ọdọ, lẹmẹ fukĩ fọbẹ flee nye ọdọ.

## XIV

*Paulo Buki Ele Kọdzela Ne Hũhũ Kpalewa Futetsa a Akũ.*

I Foesũ ọdọ enya fọtsa a kĩ foe liti míatomena mọ ọsĩ mọ ọsĩ, lẹmẹ miwe hũhũ kame futetsa liti osi, titiliwu Baguma onukpẹ kanye.

II Kitonekĩ nte odi deĩ kọbẹ kĩ yale kọdzela ne tide ahọlọ ahọlọ kame ni bẹmọ Baguma odi ale kọdzela, lẹmẹ nné bẹmọ bati kitonekĩ beláanu foe kayọ. Fọnye fọletsa kọlawa kĩ futo Hũhũ Kpalewa a sekẹ.

III Lẹmẹ nte odi nye Baguma onukpẹ ni, yabi bati kale ade yabumọ be, yado be kọbẹ, kadọla be tọwọle lẹmẹ.

IV Oti kĩ yale kale ne tide ahọlọ ahọlọ kame kĩ bati lánu foe kayọ ni, ye odi akũ yabumena. Lẹmẹ odi kĩ enye Baguma onukpẹ ni, yabumena bate badone a flee.

V Nwe kĩ mipuli mile kọdzela ne tide ahọlọ ahọlọ kame, lẹmẹ nte mipuli minye Baguma onukpẹ ni fọnẹnẹ fọbẹ. Kitonekĩ nte odi nye Baguma onukpẹ ni, ebumọ asọli bati a eba odi kĩ yale tide ahọlọ ahọlọ, mbọente odi bebā nye foe kayọ fọnya kabumena fọkpa bati a flee.

VI Nwaẽ amẹ, nte ãya ne mi sekẹ ãyale kọdzela ne tide ahọlọ ahọlọ kame kĩ odima tánu foe kayọ a ni, nfasọ wọdabe deĩ ne foe kame fọkpa

mi? Leme nte nkwa kanyekatsa kadi, kadikanyi kadi, Baguma onukpẽ kanye kadi ñye kadikanyi, Baguma foletsá, fotsa katsa fudi mma mi ni, ade foe aakpa mi kabumena a.

**VII** Ade aye kagbulee ñye osankuo, titw kĩ folá nkpã malo ni, foe odo deĩ. Nte betávõ ñye bebwa foe ne osi odi akũ ni, nde baakena biyi odo a osũ?

**VIII** Kitonekĩ nte oti a kĩ yavõ kagbulee távõ ke kavõ wĩ ni, nde kawũ banone aakena binyi kĩ bepai be bekpa kawũkanw?

**IX** Ade ayea nte ole kodzela ne tide bebã kame ni, nde bati aakena binu nw foletsá a kayw? Fotsa kĩ ole kodzela ne owe kame.

**X** Tide ahw hw deĩ ne katinya kame, ade te flee tideĩ kayw kanu a.

**XI** Leme nte odi lánu yĩ tide ni, ndani oti kĩ mapw nkpa ye, ade ke ye malo edani wptwni ekpa yĩ a.

**XII** Ne kĩ miawe kĩ miana hũhũ kame futetsa mw osĩ mw osĩ sũ ni, mivia Baguma ekpa mi fukĩ fõanya kabumena fwkpa asoli bati a flee.

**XIII** Odi nye odi kĩ edeĩ kwẽ kĩ yale kodzela ne tide ahw hw kame ni, eke Baguma aduli ekpa ye foe kaywkanye kwẽ leme, lkw enye letsá a kĩ de ele a kayw yededeede.

**XIV** Kitonekĩ nte mbwa mpae ne tide ahw hw kame ni, yĩ hũhũ kw bwa mpae leme yĩ adzuni leláa foe kame.

**XV** Foesũ litsa kene kĩ nkena? Maabwa mpae ne hũhũ kame ade maabwa mpae leme ne foletsá kĩ manu foe kayw kame a. Maasã twnw ne hũhũ kame ade maasã twnw leme mw foletsá kĩ manu foe kayw a kame.

**XVI** Nte amu Baguma ne hũhũ kame ni, nde oti a kĩ etánu nọ fọletsa kayọ ne katsenakõ a aapuli etunọ kĩ, “Fọya lomo” ne nọ kọle kanye a onukpě?

**XVII** Nte nọ kọlekanye mpaebọ a nene malo ni, fotábumena oti bebã ne osi odima akũ.

**XVIII** Manye Baguma kọle kĩ mapuli kale kọdzela ne tide ahọlo ahọlo kame kaba mi kame odi nye odi.

**XIX** Leme ne boe katsena kame ni, mawe kĩ male fọletsa sukuloo kĩ bati aanu foe kayọ bekọa bekọle fọtsa, keba kĩ maale fọletsa pii ne tide bebã kame.

**XX** Nwaẽ ame, mitato tibusẽ ne mi kakona kame. Mikena nde babisẽ nte fonye tọkpa leme mibo ane ne kadikanyi kame.

**XXI** Betselẹ ne Katselẹ Kpalewa a kame kĩ,  
 “Maale kọdzela mo yĩ kade bati  
 ntsã bati kĩ bale tide ahọlo ahọlo akũ.  
 Ade maabi be kale ntomena banovõẽ tunukpě,  
 leme beláatse yĩ kale.”

**XXII** Foesũ miamo kĩ kọdzela kale ne tide ahọlo ahọlo kame nye nsentseleni fọkpa bikĩ betáte bido, nné bikĩ bete bido a. Leme Baguma onukpě kanye nye nsentseleni ekpa bikĩ bete bido a, nné bikĩ betáte bido a.

**XXIII** Foesũ nte asoli bati flee tsena mo odi nye odi lamena kọdzela kale ne tide ahọlo ahọlo kame, mo fọya kĩ bati pupulidza ñye bikĩ betáte bido deĩ ne mi kame a, nné kale baale kĩ mi fọlo kame bu kade?

**XXIV** Leme nte odi nye odi lamena Baguma onukpě kanye mo oti pulidza ñye ekĩ etáte edo

ya ne awã ni, letsa kĩ yanu aafõ edani ye owole kame. Foletsa a kĩ yanu a aadzemo ye,

XXV ade letsa kĩ ekoa ekola ne ye kame aane fowa pefee a. Yaadola ye akũ emu Baguma ele kĩ, “Onokoli, Baguma deĩ ne boe kame ne awĩ.”

*Bekena Mbla Bekpa Asoli a.*

XXVI Nwaẽ ame, ade fukĩ mawe kĩ mikena a. Nte mitsena kĩ miasum Baguma ni, mi kame odi deĩ kĩ yasã ono, odi atsa fotsa, odi deĩ kanyekatsa kĩ futo Baguma sekẽ, odi ale kodzela ne tide bebã kame, ade odi leme anye letsa a kĩ bele a kayo a. Kenẽ kĩ miakena letsa a kĩ foado asoli bati a flee kobẽ.

XXVII Nte odi aale kodzela ne tide bebã kame ni, bati nviã iye be elale bele bitomo akũ, leme kenẽ kĩ oti bebã anye letsa a kĩ bele a kayo.

XXVIII Nte odima lelãa kĩ yaanye foe kayo ni, kekõ oti a kĩ yale kodzela ne tide bebã kame a ekena dĩĩ ele kodzela ekpa ye akũ mo Baguma.

XXIX Bati nviã iye be elale benye Baguma onukpẽ lokoa bati nkae a besa foletsa a kĩ baale a kame.

XXX Leme nte odi deĩ ne katsenakõ kĩ ete kanyekatsa etomena Baguma sekẽ ni, owula kĩ elamena kodzela kale a efõ kale.

XXXI Mi a flee miapuli mile Baguma foletsa omoa omoa ayekĩ odi nye odi aakole fotsa ekoa foe edo ye akũ kobẽ.

XXXII Bikĩ banye Baguma onukpẽ a bipuli bipi be akũ ne foletsa a kĩ bale a kame,

XXXIII kitonekĩ Baguma táwe kĩ bona ne otutũ kame mbom budzi ne omoa kakena mo lukudo kame.

Ade aye kene kī fona ne Baguma tesoli a flee kame a.

**XXXIV** Kene kī batsole bekena dīi ne fotsenakō. Betákpa be osi kī bale kodzela, ade Yudafō mbla leme tsa kī betanya loto ne adzuma adima kame a.

**XXXV** Nte bewε kī banyi litsedi kame ni bivia be banyo ne kola. Fonyε konyōã fokpa otsole kī yale kodzela ne bate badone katsenakō a.

**XXXVI** Mi sekē Baguma kale a ne kito mbōεε? Mbōεε kī mi odi bekōa ke bema?

**XXXVII** Nte mi kame odi kōna kī enye Baguma onukpē onyene, iye edeī hūhū kame futetsa ni, enyi kī letsa a kī ntsese mamena mi a nye boe ɔlate mbla kī ekpa.

**XXXVIII** Leme nte odi tátse fukīi ni, mi malo mitatse ye kale.

**XXXIX** Foesū nwaē ame, fonya mi kawε mo ośī mo ośī kī mianye Baguma onukpē, leme mitasua bikī bale kodzela ne tide aholo aholo kame a osi.

**XL** Kene kī miakena letsa nye letsa ne de osi akū mo obu kame.

## XV

### *Mite Anε Ne Fotsa a Kī Bote Budo a Akū.*

**I** Nwaē ame, nwe kī mate mi anε ne Kale Wī a kī nde letsa nkpa mi a akū. Mite ɔledo a mido ade mi katekado dzē ne foe akū pintii a.

**II** Ade foletsa wī a kī nde foe akū letsā nkpa mi a. Miana kate nte mipi foletsa wī kīi midomō akū mo ośī mo ośī, nte nné aye ni, kekō kate mite mido pupulidza.



III Fọletsa titiliwu a kī nte a, ade foe nkọa nkpa mi a. Ade foe nye kī Kristo ku ne boe tọkpa lolọ, nde ayekī betsele ne KatsELE Kpalewa a kame a.

IV Bibila ye ade ke ne luwi lelalede akū ni, Baguma dzela ye edzi nkpā nde ayekī betsele ne KatsELE Kpalewa a kame a.

V Enye ye akū etsa Petro, mọ foto banyane ewua-nviā a flee.

VI Ke liti a, enye ye akū etsa bikī bitomọ ye kī bebē bati oha elo ne loko mọa kame, ade be kame badi pii dzi nkpā keyawo nviā kī leme be pii tē kuwa liti.

VII Eyanye ye akū etsa Yakobo, ade ke liti enye ye akū etsa foto banyane a flee a.

VIII Ne ke kawūna a, enye ye akū etsa yī malo, tito kī nkena nde oti kī betāma ye ne loko wī kame.

IX Kitonekī yī nye obisē kolaa ne foto banyane a kame, ade ntáfeta nkpa kī bave yī foto onyane malo, kitonekī ntomọ Baguma asoli bati a liti.

X Leme ne kī Baguma mọ yī konya sū ni, ekena yī oti a kī ye mane finyaakī. Ye konyakamọ kī tākena fotsa pupulidza. Nkena adzuma paa mba foto banyane bebā a, kī nné yī mọawe kobē nkọa nkena, mbom Baguma konyakamọ a libumọ yī.

XI Foesū nte fọletsa a to yī sekē o-o, futo be sekē o-o, ade foe akū boe flee boade letsā a. Fonye letsa a kī mi malo mite mido.

### *Baguma Dzela Kristo Etomena Kanokpa.*

XII Finyaakī boe oledo nye kī Baguma dzela Kristo etomena kanokpa. Nde sū mi kame badi ale kī beláadzela banokpa bidzi nkpā?

**XIII** Kitonekĩ nte banokpa láyidza ni, kekõ fọatsa kĩ Kristo táyidza.

**XIV** Nte Baguma etadzela Kristo eto kanokpa ni, kekõ bolá letsama kĩ boade letsã ne de akũ, ade mi malo letsama leláa kĩ miatε mido a.

**XV** Letsa a kĩ lebe nye kĩ foadã nde boma fovã boate ne Baguma akũ, kitonekĩ bole kĩ edzela Kristo etomena kanokpa. Leme nte onokoli fone kĩ banokpa leláyidza ni, kekõ Baguma tádzela Kristo.

**XVI** Kitonekĩ nte Baguma etadzela banokpa ni, ade aye a etádzela Kristo leme a.

**XVII** Nte Baguma etadzela Kristo ni, kekõ mi katekado nye owe kame fotsa ade ke miábuki mina ne mi tokpa kame a.

**XVIII** Foe kayo leme atsa kĩ bikĩ betε Kristo bido fomɔ biku ni, betána kate.

**XIX** Nte boe anε teĩ ne Kristo akũ fokpa katinya kĩĩ odi kõ ni, kekõ boe akũ ako konya paa kaba odi nye odi ne katinya flee kame.

**XX** Leme kale onokoli a nye kĩ Baguma dzela Kristo etomena kanokpa ade fonye kasipi kĩ bikĩ biku a ni, yaadzela be malo.

**XXI** Kitonekĩ nde ayekĩ wuda tsã oti akũ eya ne katinya kame a, ade aye bati kayidza kato kanokpa leme tsã oti akũ a.

**XXII** Nde ayekĩ bati flee aaku ne kĩ benε bito Adam kame sũ a, ade ayea Baguma aadzela bati flee ne ayekĩ bekena omɔa mɔ Kristo sũ a.

**XXIII** Leme Baguma aadzela odi nye odi ne ye nhihie a kĩ ekena eyi akũ. Kristo nye oti otonyade, ke liti loko a kĩ yaabuki eya a, yaadzela bikĩ benye ye bade a.

**XXIV** Ke liti a, katinya kawũna aaya. Kristo aanya hũhũ flee kóbě, katinya kame otumifo mo bikĩ bideĩ kóbě akũ, lókɔa ekɔa legākanyakō a edo ne Baguma boe Ọlega awe.

**XXV** Kene kĩ Kristo enya legã kenawo kĩ Baguma nya bakesĩne flee akũ, ekɔa ye abɔa ete ne be akũ.

**XXVI** Okesĩne nkae kĩ Baguma aanya ye akũ nye wuda.

**XXVII** Kitonekĩ bele ne Katsɛle Kpalewa a kame kĩ, “Baguma fō ekɔa ye abɔa ete ne letsa nye letsa akũ.” Fɔwaa yedede kĩ nte bele kĩ “letsa nye letsa” a, fɔátsa kĩ Baguma awe a kĩ efō Kristo kɔa abɔa ete ne letsa nye letsa akũ a tseka ne foe kame.

**XXVIII** Leme nte bekɔa letsa nye letsa bido ne Kristo legākanya kayɔ ni, ye moawe kĩ enye Obi a, aakɔa ye akũ edo ne Baguma a kĩ ekɔa letsa nye letsa edo ne ye kayɔ a kayɔ. Baguma aanya legã ne fɔtsa flee akũ.

**XXIX** Finyaakĩ, nde nye bikĩ bekena be mui kawɔla amanie ne bikĩ biku lolɔ a? Litsa nye likĩ baamo ne foe kame? Nte onokɔali fɔane nde ayekĩ badi ale kĩ Baguma leláadzela bati bidzi nkpã a, nde sũ befō bekena boe be mui kawɔla amanie?

**XXX** Nde sũ boe fɔto banyane a malo budeĩ ne nkpã mo wuda kayite lókɔ nye lókɔ?

**XXXI** Nwaẽ ame, ndeĩ ne wuda awe kame luwi daa. Mapia ne mi akũ ne kĩ bɔkena omɔa mo boe Ọlate Yesu Kristo sũ. Ade foe lɛfō manye foletsa kĩ kanya a.

XXXII Nte fonye otidziwa kakona onukpě sũ mo nvũ lɛma mo bayae kpa kĩ bela nde bati aye ne Efeso ne awĩ ni, litsa nfaso nna? Lɛme nte beláadzela banokpa bidzi nkpã ni, kekõ fuketi mo kale a kĩ bale kĩ,  
 “Mifõ bonya boma,

kitonekĩ kunya bóaku.”

XXXIII Mitafõ beke mi. “Tókobato abula oti kĩ edeĩ obla wĩ kade.”

XXXIV Milola adzuni wĩ kaboe, lokoa mifõ tokpa kakena. Mabi mi kĩ konyoã foane fokpa mi kĩ mi kame badi linyina Baguma.

*Paulo Le Kodzela Ne Banokpa Kabuki Kayidza Akũ.*

XXXV Odi aavia kĩ, “Nde banokpa aapuli biyidza bidzi nkpã? Sukena sowodabe odu baana?”

XXXVI Odzimbifo ane! Nte odu kutse libi, libi a leláame nte letávõ ne tite kame.

XXXVII Letsa kĩ odu a nye kutse libi pupulidza, nde ligbanobi iye fudutsa bebã. Fonyé kutse munumunu kĩ oboe odu foane.

XXXVIII Baguma kpa kutse libi a na sukena a kĩ yawe, ade ekpa libi nye libi de sukena a.

XXXIX Fotsa kĩ fudzi nkpã flee lelá sukena moa odu, batidziwa deĩ be sukena odu, bayae deĩ be side, kovolabi deĩ be side, ade kofobi lɛme deĩ be side a.

XI Ode kame fotsa deĩ be sukena, fomõ tite akũ fotsa lɛme deĩ be sukena. Ayekĩ ode kame bati ale kadã a vemena ne ayekĩ tite akũ bati ale kadã a akũ.

XLI Suwa deĩ se karpale, odeto deĩ ye karpale. Fusibii lɛme deĩ foe karpale lite lɛme ne foe kame malo fudeĩ foe karpale futefute.

XLII Ade limii f́ána nte Baguma aadzela banokpa bidzi nkpá a. Nte bibila onokpa ni, sukena a aavõ, leme nte bedzela ye ni eláabuki eku.

XLIII Nte bibila sukena a ni, saále kadã ade selá osĩ a. Leme nte bedzela ye ni, yaale kadã, ena kóbẽ leme.

XLIV Nte bibila onokpa ni, enye sukena pupulidza, leme nte bedzela ye ni, yaana hũhũ kame sukena. F́waa pefee kĩ oti sukena deĩ ade hũhũ kame sukena leme deĩ a.

XLV Kitonekĩ Katsɛle Kpalɛwa a le kĩ, “Baguma b́oa oti otonyade a kĩ enye Adam nde otidziwa aye.” Leme Adam nkae a nye Hũhũ kĩ yakpa nkpá.

XLVI Nnɛ hũhũ a lenya loto ɛya, mbom otidziwa a ya f́omɔ hũhũ a leme yaya.

XLVII Baguma b́oa Adam otonyade a etomena tite kame, leme Adam oyade a kõ to ode.

XLVIII Bati a kĩ benye katinya kame bade a la nde oti a kĩ beb́oa ye bitomena tite kame a. Bikĩ benye ode bade leme la nde okĩ eto ode a aye.

XLIX Nde ayekĩ budeĩ ne ekĩ beb́oa bitomena tite kame kutitse odu kame a, ade aye b́ána ne Otidziwa a kĩ eto ode kutitse a kame a.

L Nwaẽ ame, letsa kĩ matsa nye kĩ letsa kĩ lideĩ sukena mɔ bab́oane ni, leláapuli lena kanyakõ ne Baguma legãkanyakõ a kame. Letsa a kĩ laaku ni, leláapuli lena ne f́otsa a kĩ foláawɔ a kame.

LI-LII Mitse onokali kale kĩ kĩ beḱoa beḱola boe. Nnɛ boe flee aaku, leme nte bevõ kagbulee nkae a ni, boe flee b́adani deedimɔape. F́óaya ne sinepo kab́oa mɔa kame. Kitonekĩ nte

beṽṽ kagbuleε a pε, Baguma aadzela banokpa flee lokoa beláabuki biku dadaada, yaadani be bekená bati ṽṽ.

**LIII** Kitonekĩ letsa kĩ laabu kade ni, kene kĩ ledani lekena letsa kĩ leláabu kade, ade letsa a kĩ laaku ni, kene kĩ ledani lekena letsa kĩ leláaku.

**LIV** Foesũ nte foya kĩ letsa a kĩ laapuli libu kade dani lekena letsa a kĩ leláabu kade ni, lokoa foletsa ne Katsεε Kpalεwa a kame aaya ne foe kame kĩ, “Bεwola wuda, benya ye akũ.”

**LV** “Wuda, nde no anunyam a kĩ odeĩ a?

Nde no kobẽ a kĩ onεε apila boe a?”

**LVI** Wuda te ye kobẽ kĩ enεε yapila boe a etomena titikpa kakena kame, ade titikpa kakena leme te te kobẽ titomena mbla a kame a.

**LVII** Leme boanye Baguma kole kĩ ekpa boe anunyam etsāmena boe Olate Yesu Kristo akũ.

**LVIII** Foesũ, nwaε ame kĩ maátuno kale, midza pintii, mitakpā ne mi adzuma kakena kame. Midane boe Olate adzuma kakena, kitonekĩ minyina kĩ adzuma adi nye adi kĩ mikena lenyé adzuma pupulidza ekpa boe Olate.

## XVI

*Bate Badone a Kena Seme Kale Bekpa Baguma Bati Bebã.*

**I** Finyaakĩ, ne sika a kĩ miawe kĩ miate mikoa mibumena Baguma bati ne Yudea a akũ ni, mikena nde ayekĩ mbi Galatiafo bate badone kutsu a kĩ bekená a.

**II** Ekwansieda nyé Ekwansieda ni, mi kame odi nye odi emane sika ne ye kotokase onukpẽ eyi, lokoa nte ãya ni, foláasĩ kĩ miate togole.

III Nte ãya ni, maakpa bati a kã mite awε ne be akũ a tuvoli, lokɔa bekɔa mi futetsa benamena Yerusalem.

IV Nte fɔasĩ kã yĩ malo nnaa ni, bɔmɔ be bóatsã kɔbɔa mɔa.

V Maatsã Makedonia kame fɔmɔ maaya ne mi sekẽ, kitonekĩ nke otse kã maatsã awã lemε.

VI Ōsa maana ne mi sekẽ sukuloo ne osili lokɔ flee a, lokɔa nte madzakũ ni, míapuli mibumɔ yĩ ne yĩ osi akũ kanaa kame ne kako nye kako.

VII Ntáwe kã yĩ kasela a fɔdã lukũ lokɔa ntẽ nnaa lotɔ. Nwe kã mana ne mi sekẽ lokɔ gɛlɛlɛ nte boe Ōlate kpa osi.

VIII Maadzi ne Efeso ne awĩ kenaawo Pentekoste luwi a akũ,

IX kitonekĩ osi waa paa ekpa adzuma sãwa baũ kakena ne awĩ, tito kã bati pii yidza bedza ne yĩ akũ malo.

X Nte Timoteo ya ne mi sekẽ ni, mite ye atuu kitonekĩ yakena boe Ōlate adzuma ndε yĩ aye.

XI Odima etadã ye ndε oti kã elã kadzakõ kadima, lemε mikpa ye kabumena lokɔa enaa ye osi akũ ne lukudo kame, emuniki εya ne yĩ sekẽ, kitonekĩ madã anε kã bemɔ boe bawaẽ a aamuniki beya.

XII Finyaakĩ, kalε ne boe ɔwaẽ Apolo akũ nye kã, lokɔ pii mado ye kɔbẽ kã bemɔ bawaẽ bebã a beyaasela mi, lemε fɔnyé ye kawε kolaa kã yaya ne awã lokɔ kã kame. Nte ena osi ni, yaaya ke liti.

*Paulo Kɔde Nkaε Mɔ Kawõna.*

XIII Mina ne kukũmanε kame, midza pintii ne mi katekado kame. Mido ɔwɔlε, mido akũ kɔbẽ lemε.

**XIV** Mikena mi tudzuma flee ne ɔɔɔ kame.

**XV** Minyina kī Stefana mɔ ye tɔtɔ kame bati a nye bati batonyade kī bedani towɔle kame ne Akaia, kī bekɔa be akū bekpa Baguma adzuma kakena. Nwaɛ ame, make mi aduli kī,

**XVI** mitomɔ lotɔ banyane kīi odu ɔbla liti mɔ bati bebā kī bakena adzuma kabumɔ boe.

**XVII** Kawɔle deī yī kī Stefana, Fortunato mɔ Akaiko ya bideī ne awī ne mi kadokɔ.

**XVIII** Bido yī kɔbɛ nde ayekī bido mi kɔbɛ a. Kene kī buyi bati kīi odu ɔsū.

**XIX** Bate badone a kī bideī ne Asia kamekame a awɔna mi. Akwila mɔ Priskila mɔ asoli bati a kī batsena ne be tɔtɔ kame a awɔna mi ne boe ɔlate dī akū.

**XX** Nwaɛ ame flee a kī bideī ne awī bo nwɔna mi nkpa be tsoo!

Mitu miboomu akū ne towaɛ kame.

**XXI** Yī Paulo mɔawe lekɔa awe ntsɛle kawɔna kīi.

**XXII** Odi nye odi kī yaáwe boe ɔlate kale ni, ekɔa ne ke a! O boe ɔlate, ya!

**XXIII** Boe ɔlate Yesu kɔnyakamɔ kitomɔ mi.

**XXIV** Yī ɔɔɔ enamɔ mi flee ne Kristo Yesu dī akū. Fɔya lomɔ.



**Baguma Apam Vɔɛ a Tuwuli**  
**Tuwuli: Baguma Apam Vɔɛ a Tuwuli New Testament**  
copyright © 2008 Wycliffe Bible Translators, Inc.

Language: (Tuwuli)

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 28 Dec 2024 from source  
files dated 29 Jan 2022

68df0193-2981-5275-8994-8f743fe01e5e